

69 *Depositione di Alvise Muschatello, masser al fontego di todeschi, solito andar armirajo di zenerali, di quanto el fece quando l'andò a Trieste, dil 1511, dil mexe de marzo; la qual mi dete de sua man.*

Come del 1511, la domenega avanti quella di Lazara, vene nuova in questa terra, che i bregantini da Trieste haveva piado molti de i nostri navilij e barche, unde la nostra illustrissima Signoria manda per i comiti, che andavano a Constantinopoli, che jera Zaneto Draganelo, e l'altro Marcheto de Andrea, che l'horò trovasse galioti e balestrieri, ch'era scriti con quelle galie, e armar barche per andar a trovar quelli bregantini; e in quella matina i andò a la Signoria, e disse, che l'horò non poteva trovar homeni si im pressa. La nostra Signoria mandò per mi, e me domanda, si podesse trovar homeni per partirme quella sera. I dissi, che i me desse tre barche de oficiali, e subito i mandò per la barcha de l'avogaria, e per quelle do barche, che jera Bicharei capetanio, de la stimaria; e subito, quella sera, che fo la domenega avanti Lazaro, fo a di 31 dil mexe de marzo, e me partì con un cativo tempo, e andasemo avogando contra vento. La matina se trovasemo a Lio mazor; la sera andasemo in Baxelega, da una hora de note, trovasemo pi de barche X, e me disse, che quel zorno do bregantini, de quei di Trieste, i haveva dado la caza, e che per niente i non andasse avanti, perchè i era do volte più homeni cha nui. La matina, avanti di, me levì de là, e andì dal podestà de Maran, e i dissi quel che haveva inteso; e lui me de' una barcha con homeni X dentro, e andì a Grao. El retor de Grao, che fo el marti, me de do barche con homeni XX, e se trovemo el marti da sera con barche 6 e homeni 54; e quella sera, che fo el marti de note, andasemo in bocha de l'Isosonzo, e stesemo tutta quella notte a far la varda, e stesemo là anche tutto el zorno drio, che fo el mercore, perchè le altre volte i bregantini, quando i tornava a Trieste, i feva quella volta. E, come fo el mercore da sera, a una hora de note, me missi con quelle barche per andar a Trieste a cavar, o bruxar quei bregantini, perchè, me fo ditto, che non dormiva se non 4 homeni a la varda de quel porto, e per 4 homeni non haveva paura de non far tutto el debito, o i cavaria via di quel porto e menari al so despeto. E quando se prosimasemo arente Trieste, e viti al porto un gran fuoco, e andì tanto arente, che vedeva tutti i homeni che andava su e zo, e non savevemo quel che i feva. Cho viti non poder

far niente, andì a Mugia, cercha a hore 8 di note, e andì dal podestae, e i dissi perchè vegniva là. El me disse, non fassemo niente, perchè è cazudo do torre da la banda de San Francesco in Trieste, e, quella note, i feva un reparo, e i messe 40 homeni che feva la varda sempre là; e mi rispasi al podestà di Mugia, si l'horò se 40, andemo nui 200; quanti homeni me pode' vu dar? El me response: Te ne darò 100, e mindenò (*sic*) 54, che son 154. Damatina anderò in Cao d' Istria, e domandarò al podestà qualche homo. La note propria seondesemo le nostre 6 barche, e la matina andì in Cao d' Istria, che fo el zuoba, e andì dal podestà, e i domandì qualche barcha arma'. El me response, che l'haveva mandado el fior de la terra a Caorle contra el podestae, e non haveva nissum di boni. E i dissi, che l' mandasse per el soracomito postizo de la galia, fo soracomito missier Hironimo Lando, qual fu missier Antonio Memo; e cussì mandò, e anche per so comito, e trovò homeni 50 de quella galia, et i messe in barche 5 e in una di la terra, e domandì sei stratioti, era là. El podestà i mandò a chiamar e dissi: Ogni muodo vuj andè fuora, con 80 cavali e 400 pedoni vegni da la banda da terra, e nui anderemo da la banda da mar. El me domandò, da che hora di note i dovesse andar de là; i dissi, che i dovesse andar a l'una, a monte la luna, va a monte, la zuoba de note de Lazara, a hore 6 e un quarto, e ehussì dessemo hordene. E i di' el nome si se havessemo incontrao, chi viva, viva San Zorzi, per cognoser li nostri; e me partì da Cao d' Istria e vini a Muja, questo zuoba, proprio la sera, e i fisi dormir infina a hore 5 di note, e i chiamì tutti suxo. Era barche da Muja X, con homeni X per una, e de pi, da Cao d' Istria, era barcha una e cinque dei galioti, ch'era 50 homeni de galia e X de la terra, in le nostre 6 barche homeni 54; e tutti i chiamì arente la nostra barcha, e i dissi a tutti, come haveva dà hordene con i stratioti e i pedoni, che, a luna a monte, l'horò dese de là, e che nuj dassemo da mar. I dissi, che i dovesse vegnir de bona voia, chè i vadagnerebe, chè in quelle barche, che se dentro, giera carche de merchadantie. I dissi, che mi voleva andar avanti e che i 70 me vegnisse drio, azò che i vegnisse più volentiera, e di' hordene che mezi vegnisse in terra, e mezi stesse in le so barche con i archi in man, e sempre trazesse a i merli de la terra, e i di' la nome a tutti, chi viva, viva San Zorzi, e aspeti infina a hore 7 1/2 de note. La luna era andà a monte de un' hora e meza, e non sentisemo vegnir i stratioti, e dissi ai nostri: Andemo nui, e andì in terra la mia barcha e quella